

四庫全書

集部

欽定四庫全書

集部

玉笥集卷一

詳校官中書臣孫衡

中書臣劉源溥覆勘

總校官進士臣朱鈴

校對官編修臣錢樾

謄錄監生臣沈錫爵

欽定四庫全書

集部五

玉笥集

別集類四元

提要

臣等謹案玉笥集九卷明鄧雅撰原本集首

但題鄧伯言而不著其名今案集中洪武壬  
戌辭聘詩有雅以非才例蒙郡舉云云則知  
其名為雅而伯言乃其字也又詩作於郡中  
徵聘之時而末一卷為朝京紀行詩且有應

制賦鍾山雲氣沴寒之作則是當時懇辭不  
允仍起送入都朝見後始得請歸老者矣時  
梁寅方講學石門山中雅為其鄉人因以近  
藁屬定相與酬贈篇什頗多辭榮名而就有  
道其志操亦頗有可尚者乃江西通志失載  
其人詩集亦諸家俱未著錄惟此抄帙僅存  
卷首有梁寅序及答書一首何淑丁節戴正  
心序各一首謝觀題詞一首皆極相推挹今

觀其詩格調平正雖未免稍涉率易而氣味  
沖澹頗有自然之致究為不失雅音與梁寅  
石門集體裁正復相近宜其契合之深也明  
初詩人遺集之獲傳者已渺此固亦足備一  
家矣乾隆四十五年六月恭校上

總纂官臣紀昀臣陸錫熊臣孫士毅

總校官臣陸 費 墉

金匱要略

提要

玉笥集原序

世謂文章有臺閣山林之殊故其氣有溫潤枯槁之異  
文章固然詩之為道亦猶是也余獨謂詩之作也有正  
變焉正固謂盛至於情發於聲止乎禮義又變之不失  
其正者也情之所發言辭出焉聲之所止禮義存焉故  
氣應乎外情發乎中若功業加於民聲光昭於時則其  
氣自壯和順積乎中英華見乎外則其情自婉氣可以  
學而為情不可以強而至曾謂山林之不可為臺閣臺

閣之不可為山林乎譬之太羹玄酒醇醪萬永查梨萍  
菹淡腴酸溢食者各適於口而其出於自然者蓋不以  
氣而以情也余友鄧君伯言行純而學優才美而志遠  
少力於學壯而未行老於風騷乃有所得其為詩歌每  
出人意表簡而不疎直而不俚其間道氣運之盛衰論  
人事之得失往往從容不迫而意已獨至使接踵陶韋  
間未見其大相遠也視所謂山林枯槁者蓋不侔矣是  
果氣使之然歟抑情乎哉嘗示余以所為玉笥集數百

篇且求為序余因諷味有感焉嗟夫今之於詩道者或氣滿志得則不暇以為或羈愁窮困則不得以為若君者學於少得於壯成於老富貴榮達之心雖淺而溫柔敦厚之度愈深是果詩之幸歟其亦君之幸也歟將見由變而之正由山林而之臺閣所謂宣宮商諧金石以鳴國家之盛者未必不在於君也吾老矣幸獲見之尚當有徵斯說姑以是為序洪武乙卯七月既望臨川老友蠻闇道人何淑書

觀鄧君伯言詩如春風林塢卉木鮮麗泉石清冷時禽  
響答自然天趣有動人處繇其好尚之專且久也推是  
心以往何事不可求使居通都大邑觀乎明堂郊廟之  
制作則又將有得發而為金鐘大鏞之音矣古有太史  
采詩以觀民風設今有之則君之五言冲澹中多古意  
歌謡善諷切最近人情有足采者矣尚勉焉以俟洪武  
丙辰之歲子月下旬澣前承事郎監察御史丁節書

余老處巖谷諸賢以詩覩余者亦多矣及觀鄧伯言父

玉笥集為之竦然知其得之天趣異於強作之者也詩  
之搜羅以為富雕繪以為妍索幽以為奇放情以為豪  
若是者工則工矣謂得古作者之意則未也伯言之所  
造蓋已深故冲澹自然華不為媚奇不近怪雄不至放  
求合典則故宜然者哉前御史丁君子堅評其詩謂其  
好尚之專且久故清麗自然使居通都大邑觀明堂郊  
廟之盛發而為金鐘大鏞之音又當不止於是斯誠不  
易之論余雖欲加之一辭未有能過之者也雖然伯言

吐其胸中之奇以攬夫玉笥山水之秀亦奚有不足韋  
應物雖專城美祿而詩多泉石之趣孟浩然屏居草野  
無郊廟之著作而其詩亦顯伯言於韋孟近矣而進之  
益不已則知之者當益衆余之言何為哉特深好其集  
故因觀而略論之爾洪武乙丑秋八月望梁寅書

古今論詩以平淡為貴然欲造平淡者非工夫深至  
不能也若陶淵明韋應物柳子厚三家世所謂詩之平  
淡者也以今觀之狀難寫之景於目前含不盡之意於

言外其風調高古而辭旨簡遠者非區區模擬所易到誠可謂深造自得者歟或有以淺近視之是猶見玉器之天成而以為無事乎椎鑿也其可乎哉余至永豐之三年聞新淦鄧伯言氏工於詩而未之見也一日其友徐伯澄來示其所著玉笥集且曰伯言恬退之士於書無所不讀然皆用以資為詩其用心勤矣舍於同里黎季敏氏垂十年而情好甚篤也季敏尚友而好義又深知詩將率同志裒其所著命工鋟梓以傳於永久蘄一言以

為引余讀其詩大抵清遠條達不為險艱藻繪之語  
澹泊和平而無忿懥哀怨之意蓋其情性然也抑亦  
工夫深至造於平淡之域嗚呼其亦有得於三家之風  
調者乎雖然余何足以知伯言昔者歐陽公曰知聖俞  
者無如修然聖俞所自負者皆修所不好聖俞所卑  
下者皆修所稱賞夫以歐梅之知而酸鹹異好有如此  
者而況淺見薄識之士乎余何足以知伯言獨愛伯言  
用心之勤而喜季敏能成人之美也故為書於篇首而

授伯澄使歸之洪武二十二年春正月下澣會稽山人

戴正心序

梁寅來書附錄

梁寅莊肅奉書伯言聘士先生坐右寅僻處巖谷慕令  
譽積久孫德言遠訪承寄佳章鏘然妙音起發多矣弟  
愧不敢當又蹇拙不能即和答玉笥集閱之歎服德言  
欲得題數語集後固不敢辭第數日目眚尤甚只得  
且畱下俟少遲下筆亦非憚煩實欲留與諸生共觀

庶少肱昏塞耳秋涼期會如果蒙枉顧至幸或不能  
至德言重來詩集當附還高賢莫親瞻望拳切控忱  
甚愧膚率時暑保愛不備寅莊肅奉書

謝觀詩附錄

刻桷丹楹絢日明雕盤散出五侯鯖何如清廟歌周雅器  
用陶匏薦太羹前北平省檢校謝觀叔賓

欽定四庫全書

王荀集卷一

明 鄧雅 撰

四言

勤有齋銘

民主在勤 勤則不匱 我思古人 實獲我志  
乾乾夕惕 君子法之 改改為善 聖賢同歸朝  
斯夕斯勤學不息 悅我詩書并視金璧 人多逐利  
惟義是從 人多偷安 日省厥

躬先知艱難後乃可逸佩服訓辭始終不失

題王氏可逸堂

其孫永安求賦堂扁乃三十八代天師所書

人生在勤勤乃可逸動靜有常起處獲吉懷哉爾祖善行美質樂彼丘園安此居室安此居室既幽且閒或漁于溪或樵于山漁樵之業奔競所棄爾祖樂之傲俗忘世風流既遠堂構猶存居之永安宜其後昆

蘭雪堂銘

乾坤清氣人物所鍾幽蘭灑雪虛室生風蘭有芳馨雪  
乃潔白孰能比之君子之德君子之德薰陶以成我銘  
斯堂世守幽貞

五言古詩

擬古九首

鴻濛昔未判道在虛無間一從開闢始二氣乃循環物  
各一太極人心胡不然聖神立綱常足以萬世傳

龍馬負河圖鳳鳥鳴岐山羲文有聖德祥瑞出世間自

從衰周來古道日凋殘是以魯中叟已矣發長歎  
夷齊聖之清天地鍾間氣仁哉讓國心忠矣諫伐意首  
陽雖餓死萬古終無愧俯仰懷高風吁嗟勸來世

魯君昔好賢致幣顏闔家寧知賢者心視此猶泥沙一  
瓢自可樂萬鍾我何加雲山竟長往此道誰疵瑕

顏回在陋巷所樂非簞瓢仲蔚守蓬蒿素心甘寂寥斯  
溫豈我志固窮非一朝懷哉松柏姿歲寒終後凋

賢哉楚大夫何事沉汨羅懷王信讒佞吾道成蹉跎守

義死亦足偷生辱何多湘流若有恨千古作迴波

四皓居商山名聲滿天下一出定漢儲仍作肥遜者谷  
中有芝草門外無車馬俯仰思古人富貴視土苴  
淵明守道者衆妙藏心胸讀書不求解吟詩不求工得  
酒兀然醉何曾計窮通斯人去已久舉世高其風

山中有逸民戎冠大布衣悠然對松菊飲酒和陶詩落  
落忘世事嬉嬉如小兒超然慕太古猶將問庖羲

寄石門梁先生求刪近藁

聖人刪古詩足以垂勸戒愧我芻蕘言存之欲奚待弱  
齡事蟲魚于茲三十載沖澹苦未到綺麗非所愛

閑

覽衰頽拊卷增嘆慨陶韋邁前修虞范鳴近代潢汙恥  
溟渤丘垤等衡岱欲進力未能備錄意有在詩家有宗  
匠後學恒倚賴蕪田藉鋤耘廢金假爐鞴乾坤固悠久  
海宇亦弘大獨立回天風泠然響竽籟

題古文劉觀瀾潛默齋

天道固不言化機恒自然潛心悟至理以默守吾玄回

也豈誠愚賜給徒為便始知聖賢學妙在心相傳劉君  
事藏修築室文水邊焚香靜對易慕道尤精專為賦潛  
默詩三復其勉旃

題何同德獨善齋

秉善固所欲賦命有窮通獨善匪傲世舍義將焉從侃  
侃同德父學積于厥躬守已無外慕養氣恒內充巖穴  
托冥棲幽軒眄筠松陶然有真樂俯仰天地中豈徒善  
一身庶幾厲澆風

題陳敏求有裕堂

紛紛名利場局促若韁鎖君子恒裕如進退無不可構  
堂面溪山治地種花果無言以忘世所守惟在我

題一素齋

古道日凋喪斯人慕淳風誼置厭城市結宇雲蘿中戶  
牖不丹堊門間任蒿蓬但知琴書樂寧憂簾瓢空來往  
有賢士品題多鉅公清風動修竹白雲在高松終始慎  
一素令譽垂無窮

題靜寄軒

開軒納虛曠 黑坐觀無始 身外忘世紛 靜中究玄理  
棲禽托深林 潛魚在淵水 與物兩悠然 勸生念行子

知止軒為謝伯安賦

鳥雀依叢篁 鱗鰭在淵水 飛潛各自適 所貴在知止  
微物尚知止 况人為物靈 昳君止於善 庶以善自名

題黃氏清嘯軒

異境何幽偏 羣山甚奇峭 中有閒居人 憑軒發清嘯 聲

聞忽半嶺響答復千竅颯颯陰風來啾啾老猿叫翛然  
塵外想允矣靜中妙千載蘇門生惟君可同調

題謝士彥草池書館

開軒瞰清池池光滿懷抱東風扇微暄一夕生春草冥  
觀造化心頗悟聖賢道簡編時卷舒精義得深討猶憶  
夢西堂君家舊文藻

題何幼恭雲門歸隱圖

朝遊金陵館暮憶雲門山誰知軒冕榮不及樵蘇閒歸

來看瀑泉興在陰崖間  
松風有清響古琴不須彈冉冉  
白雲起翩翩孤鶴還超然出塵網似覺非人寰

題黎氏滄洲圖

滔滔大江水冉冉滄洲雲蘭杜有香氣莓苔無垢氣數  
家臨絕岸一艇橫通津漁唱落霞晚鳥啼芳樹春對景  
閱圖畫樂哉棲遯人

耕樂為黃從禮賦

山鳩鳴高樹科斗散平池甘澤既已足播穀當及時俛

焉佩古訓服田不知罷躬耕寧為恥所樂實在茲豐年  
黍稌登庶用給公私匏尊湛香醪瀛肩亦已肥農談共  
隣叟鼓腹常熙熙人生貴力本汲汲將奚為陶然上皇  
逸載誦豳風詩

題胡志同雲松巢

高風慕太古喜結雲松巢食松復食柏葺雲如葺茅氣  
氤翠色合渾淪元氣包謫仙本同志巢父為舊交徵起  
拜龍袞乞歸吹鳳匏還將御賜筆挂左凌雲梢

盤泉為李原初賦

盤中有真樂君子恒慕之徑轉得幽處泉流無盡時潭深老龍蟄藻密潛鱗依俯瞰照鬚髮渴飲清骨肌忘情或漁釣洗耳無是非吾才匪韓子愧爾來徵詩

題謝氏堅白齋

堂東有白石堂西有白石堂南有白石堂北有白石團團若天成光彩眩玉色煮之可充饑拂之可為席磨涅不磷縕宜比君子德若人好斯堂因之扁堅白

題宋彥輔梅屋

幽人愛孤芳貞白比冰玉寂寞竹籬間相依結茅屋久  
香似無聞一清如可掬不有鐵石心誰能伴幽獨

鵝溪釣叟為陳充賓賦

前林帶溪水湛湛寒潭深垂綸不設餌鯈鰐自浮沉明  
月照孤艇清風飄素襟物我俱兩忘悠然塵外心

贈道者張回風時寓居雙林寺

回風西北來入我雙樹林松聲常在耳彷彿絲桐音靜

時若有得動處元無心炎天訪禪宇為我開煩襟

寄陳伯玉徵士自號雲樵

桃李耀芳園芝蘭翳深谷世人競紛華君子秉貞獨繙  
思雲樵翁中心澹無欲懇切辭簪纓還山養麋鹿

養鹿春草肥樵雲碧山深投閒固所願沽名本無心清  
澗可濯足微風亦飄襟蕭然坐盤石長歌有餘音

君歌我還續聲入雲霄間能使潛蛟舞亦招飛鶴還依  
稀在仙島恍惚非人寰擾擾當世士胡為多苦顏

白雲中人為陳知縣賦

青山何遠迤白雲時卷舒相看兩無心幽處真自如斯  
人在巖壑承詔升天衢回首瞻白雲浩然賦歸歟朝與  
白雲對夕同白雲居縹緲落窗戶氤氳拂衣裾雲中何  
所樂所樂在琴書常恐白雲散門外來徵車

題高山流水圖

泰山一何高江水亦何深寧知伯牙絃妙合鍾期心清  
風邈千載太息誰知音斯人好古調拂軫徽黃金一彈

玄鶴舞再彈蒼龍吟翛然山水趣得之在胸襟畫師亦  
好古能畫復能琴援筆寫幽意溪聲風滿林

題李次晦明復堂

寶鏡出匣中塵垢乃翳之一朝事拂拭鑑物分妍蚩靈  
臺素澄湛利欲或昏迷誰知方寸間至理森在茲先師  
有明訓予以覺後知性善苟能復聖賢可同歸

題鞠孟端悠然亭

淵明住柴桑門無車馬誼青山如故舊一見心悠然若

人慕高風作亭臨水邊高柳三五株蘭菊亦鮮鮮賓朋  
日過從飲酒和陶篇悠然得所樂庶以全其天

題陳寅賓暘谷齋

高齋面陽谷四序常如春挂巾扶桑枝晞髮迎朝暉雍  
熙逢治世俯仰信乾坤未知羲和事自是堯舜民

題何氏南塘舊隱

陰森野竹寒綠繞南塘幽窗虛納翠靄門閒倚清流中  
有隱淪士抱沖真寡儔垂綸聊自適守已澹無求俯仰

憶先世逍遙寓斯丘為歌少陵詩勉旃繼前修

題李氏維稼堂

逐未成澆風力本化淳俗遐思在古人播殖維嘉穀斯  
堂俯青郊窗戶蔭高木了無塵事侵稍喜生意足維時  
沛甘澤良苗藹新綠辛勤願有秋飽煖更無欲唐虞致  
雍熙巢許樂幽獨為子歌韓詩清風起盤谷

題樂閒堂

為善真可樂無營心自閒奈何世之人汨沒塵埃間是

中有佳趣游目皆青山依山構堂宇白雲鎖松闌古意  
閱圖史幽香聞蕙蘭尊前好風月泉響當鳴彈

題內弟吳大使子充墨龍

神龍潛九淵變化恍難測伊誰寫真形一覽壯心魄淋  
漓元氣濕慘淡風雨黑終當上天門四海望涓滴

贈相士黃逸仙

伯樂善相馬一顧增千金荀子頗知道相形先相心黃  
生師唐舉於義尤精深取人或漁釣所遇多纓簪嗟我

守貧賤辱子過雲林未示衡氣機贈以離別吟

黎氏積慶堂詩

并序

積慶堂者故處士黎君達山之所作也君質美而好  
義見善如不及且好施與里之貧窮患難者咸德之  
壯遊燕都謁名公卿多進之以禮已而世殊事異乃  
歸老於滄洲之上有良田廣宅為子孫計而樂於為  
善前監察御史胡公行簡與君在燕都時為舊交暇  
日過之喜君歷世變而壽富康寧子若孫環侍左右

衣冠禮樂蔚然有太平之風謂皆君之積善所致乃為顏其堂曰積慶且為之記以彰君之德洪武壬戌余始獲與君之子季敏游於滄洲之上時君去世已期年矣追思曩昔嘗識君於翠屏山中挹君之風采誠有顧交之志而恨相見之晚也嗚呼君今不可作矣余既登君之堂又惡得無情哉謹賦五言八韻詩以述君之德併以勗其後之人使勿替引之則君其可謂不亡矣詩曰

積善有餘慶不善有餘殃至公在司造報效亦已彰蔓  
草務去根猗蘭願留芳人心與天理好惡乃其常駟車  
于門高五桂竇氏昌陰德信有徵福澤其無央斯堂扁  
積慶著善斯不忘後人繼芳躅奕世垂休光

柬同宗鄧仲偉

流水本同源叢蘭亦同根匪有薰蕕異而無涇渭分余  
忝高密裔念君亦聞孫禮服既悠遠歲月復馳奔相視  
如路人莫知卑與尊茲晨得良晤永託為弟昆所重骨

肉親貴賤安足論我昔歷艱苦慷慨心欲捫八齡失所  
怙猶幸慈母存鞠育與教誨天地同深恩亂離廢舊業  
詩禮猶清門不敢忝厥祖佩服先哲言為君寫哀曲短  
筆聊復援

外甥吳緝字克熙洪武十二年二月客死於景陵  
時年二十八余哭之慟賦此以志余哀

人生天壤間脩短難一致吾甥昔四人今焉只存二緝  
也頗聰明風骨亦殊異總角事詩書英年揔材藝山林

厭拘束湖海多意氣辭親遠服賈霜雪逼殘歲昆弟爭  
挽留同侶復牽制別去一月餘還附手書至悲風忽重  
來聞作景陵鬼景陵在何方西北數千里黯黯荆山雲  
茫茫漢江水白骨埋黃沙荒阡復誰祭吁嗟乎蒼天奪  
汝竟何意惡草常蔓延幽蘭易凋悴我思平生情悽愴  
裂肝肺親老子尚孩相看祇垂淚汝父客嶺南歸骨已  
無計汝復沒他鄉不鑑覆轍獎作詩招汝魂仍以戒後

世

送何正夫西遊

野老守貧賤無營方灌畦故人將遠適問我審安危窮  
達固有命行止亦有時人能不違天履險如平夷君既  
悟斯理行矣復奚疑

寄興平稅使何維翰

自古有離別余今獨傷悲關河數千里輾轉勞夢思時  
序倏以遷容鬢日以衰蕭蕭朔風寒杳杳孤鴻飛欲往  
良獨艱相見詎有期商歌意無限零泪忽霑衣

高允憲先生客習氏館中清風修竹翛然有塵外  
意喜而賦此

蕭蕭池上竹颯颯林間風風來為誰清乃與君子同君子秉貞節翛然在山中歲寒不改操結交梅與松

客館歲暮別友人

齋居僅一畝旅寓將五旬盈几散書帙並坐儼冠紳從容談妙道彼此樂清貧燈孤不成寐歲晏喜相親寒氣正催雪梅香偏襲人情深忍離別詩就寫慙懃

夜坐有懷丁御史子堅

山齋夜岑寂落木含淒風青燈照孤影幽思浩無窮人生無定居飄轉如飛蓬美人在何許使我心忡忡援琴復置之默坐想音容

月夜有懷曾主簿伯曼

華月照虛館悲蛩鳴草根閒情還脈脈離思更紛紛感慨不成寐羈孤誰與論惟應棄官客佳思寄琴樽

寄陳壺隱

十年不相見遠客梁宋間詞華動侯伯羈思滿河關歸來厭世事采藥遊名山猿鶴共吟嘯漁樵相往還有情泛佳菊無語對叢蘭即此羨閒適營營徒險艱

寄鄒椿齡

大隱在城市小隱居山林所居雖異地所樂還同心我歌小山詞君彈流水音相知既已久相憶思難任何時遂盍簪綢繆話胸襟

寄李如愚

黃葉林中深幽泉竹根冷徐步下逢人雙飛見禽影偶傷良晤乖暫喜塵事屏佇立遙相望微雲隔松嶺

寄曾隱君大雅

其所居堂  
扁曰東樂

高山列屏嶂下有幽棲人崖壁饒古意軒窗多白雲松陰覆几席蘭氣襲衣巾其樂似東老熙熙滿懷春

北平檢校謝叔賓謫官嶺南詩以寄之

幽燕春苦寒嶺海冬尚熱寒暑君備嘗相思最愁絕君懷自夷曠君心秉貞節所願濟斯民艱難底須說皇天

幸無私白日照丹闕

寄畫者彭子惟求作松下煮蒲小景

高情似王維妙畫固無匹絕島與寒汀揮毫千兔筆飄然江海蹤佇立懷高風為作老松樹下著煮蒲公

江上有懷曾主簿

歸鴻不可留去鶴猶難招朔風起離思短髮寒飄蕭遠樹帶斜日滄江生暮潮雙飛愧鷗鳥獨立心搖搖

江上覽物有感

愁懷似江水汨汨無時休俯仰今古意淒涼天地秋鴻  
飛避矰繳魚躍驚綸釣所幸遂天性逍遙在滄洲

讀陶淵明詩二首

吟詩不須苦吟苦失詩意吾笑郊島徒彫鎬損肝肺凱  
風因時來微雨從東至憑几誦陶詩詩中有深味

我性愛陶詩難窺數仞牆閒來輒誦之愈覺滋味長太  
羹無鹽梅土鼓諧宮商誰能起公死執鞭向柴桑

醉中作

平生不嗜酒酒至苦難避罷俛事勸酬聊樂賓主意重  
觴即陶然兀坐時假寐君當恕醉人我已忘天地

讀道書作

籬落帶幽篁繁陰翳虛牖蕭然坐團蒲布衲蒙衰朽平  
生好清虛道帙常在手意會欲忘言欣然復良久

有感

昨日天氣熱披襟步林間今朝朔風勁覺我衣裳單氣  
運有盛衰天道常循環富貴何足羨貧賤何足歎

暮歸途中作

殘陽在林梢孤鳥度微影行人念歸程十里隔松嶺蕭  
蕭風色寒漠漠烟光暝稍喜近人家溪橋接村徑

客中逢鄉人得家中消息

去家不忍別久客遂忘還忽見故鄉人與語增感頗比  
隣害疵癟羣從亦凋殘所幸一室安衛生良獨難語終  
對斜日一鳥鳴空山意存恍惚際心在悲喜間

暮秋感事

寒風起蕭瑟落葉鳴空階榮枯固常理時事何其乖俯仰慨今古無由舒我懷皇天亦愁思白日常陰霾

歲暮山中夜坐

冉冉歲將暮沈沈夜初永木落風生寒窗虛月流影四隣寂無誼獨坐山齋靜孤燈照殘書妙道得深省

元正後雪霽過隣曲

晴岫消凍雪春郊布熙陽嚶嚶幽鳥鳴靜聽如調簧興懷訪故交徐步登前岡石竇通泉脈林隈散梅香稍欣

得勝地復喜升華堂文慶遇歲始共語思時康願言課  
孫子讀書力農桑

午睡初醒景與意會援筆賦此

綠陰滿庭戶苔色上階除數聲幽禽語一枕清夢餘起  
視日將午隱几觀殘書陶然若有得心存太古初

山行

山行不逢人山鳥隨我飛松風起澗壑草露霑裳衣獨  
立愛蕭爽此心忘是非何由跨仙鶴一往尋安期

喜雨二首

甘澤被丘園良苗似膏沐杖藜恣逍遙滿眼生意足野  
飲擣匏樽農談過隣曲躬耕幸有年何用干微祿  
簪纓世所榮犁鉏我所安况茲蒙潤澤豈復憂飢寒園  
中摘蔬果案上羅杯盤諸孫戲我側俯仰良可觀山妻  
顧予笑自足平生歡

喜雨寄諸友

仲夏風雨多蕭蕭涼氣生憑軒望原野品物皆敷榮唐

虞在上位海宇際升平豐年況有象一飽更無營喜來  
賦新詩持用寄高朋

雨後作

山中足時雨蕭爽如清秋飛泉灑絕壁白雲被高丘我  
性好沖澹無心事彫鏤興來且斟酌吟詠當歌謳

洪武癸亥夏五渡江訪諸友暮歸既登舟而風雨

驟至

清晨訪故舊及暮始言還發棹風雨至去留良獨難小

舟如一葉出沒波濤間兀坐喪神魄相顧慘不歡此身  
盡沾濡那復惜衣冠在險猶倉猝歷險心始寒從茲慎  
行止寧復嬰憂患

對庭樹

庭隅有佳樹偃蹇繁枝柯長夏蔽朱炎蕭蕭涼氣多玄  
蟬噪其間好鳥聲相和余亦性所愛對之聊詠歌

青山有高人

青山有高人澹泊無所求雖能抱材藝不肯干王侯龍

金匱口義 卷一  
劖藏寶匣霞衣住丹丘浩然足清興何必三神遊

### 晚涼訪隣曲諸友

晚涼步幽徑微風飄衣襟悠悠何所思所思在同心隣居二三友託好在雲林寧憂貧與賤所樂書與琴閒時輒相遇有酒能共斟醉時各分散明日重相尋

### 夏日有懷丁御史

永晝倦煩燠披襟倚南窗浮雲忽凝陰鮮颺喜微涼心境適澄靜翛然塵慮忘故人應此際高臥到羲皇

送鄧吾貫往山東省親

天地司化育品彙咸昭蘇懷哉父母恩實與天地俱生  
兒待終養服勞報勤劬兒幼父行役傷心復何如憶昔  
初別時痛哭牽衣裾闢河數十里風沙各天隅堯舜在  
上位山河歸版圖雲屯齊魯邦四境今無虞覲省戒行  
李艱難涉長途是時朔風至野樹寒蕭疎出門指天日  
見父乃旋車送者為之感聞者為之吁純孝敦古道性  
善由厥初茲行畢素願曷哉慎其軀

### 早春踏雪遊羣玉山中

山中春早寒澗道積冰雪屐齒碎瓊瑤行吟思清絕仙人乘素鸞飛下白銀闕授以長生方金莖和玉屑

### 贈星士陳鶴臯

天運固有常命理亦已微先聖既罕言後學鮮能知巫咸實詭祕虛中頗神奇衰旺酌五行禍福剖衆疑寥寥千載下術者誰繼之斯人襲世業造化窺璿璣勗哉師古人庶以鳴當時

遊金坡道院

曾閱金坡圖未訪金坡山茲晨覽勝跡恍若非人間杳  
靄數峰合蹠躡孤鶴還壇高聳石壁雲白鎖松關感慨  
劫灰後遨遊西日殘長吟下山去塵土復愁顏

謝李文煥贈圖書

圖書重斯文攷法從異代大巧人競為古拙吾所愛人  
生如駒隙俯仰增歎慨感君勒姓名或可傳千載

此老

此老日無事悠然天地間臨池羨游鯉倚檻愛青山心  
與白雲遠意同芳樹閒從渠逐聲利貧樂獨希顏

余性資庸下學術空疎白首無成私竊自慨然先  
儒有言自天子以至於庶人未有不須友以成者  
乃作取友詩一章

友道非細故乃在人倫中取友以輔仁庶幾反淳風損  
友不可親益友宜與同匪資共笑語實賴相磨礲取友  
不失人德義日以充所以君子心此道尤敦崇一日不

獲見使我憂忡忡槿心但朝暮桂性宜春冬陳雷與管  
鮑令譽垂無窮爰作取友詩于以告羣公

送鞠孟端赴京

大明麗中天仁風被寰宇子抱經濟才峩冠謁明主從  
容陳典謨慷慨論今古欽哉輔唐虞雍熙幸重覩

寒夜自釋

掩卷坐良久自傷還自釋時命偶未遭詩書其可惜囊  
中有焦桐取之還拂拭應有知音人一彈三嘆息

客夜

窗虛映華月砌冷鳴寒蟬悄悄客懷薄沉沉冬夜長經時去茅屋百念生蒲牀年華等流水鬢髮明秋霜何如守玄默歸臥南山陽

感興

烏兔迭循環山川自流峙悠悠宇宙內人生獨能幾榮華如飄風世事若流水安得求長生後天與終始

故上海令黃子律哀詩

并序

子律名鍾吉之永豐人也業儒尤工於詩有盛唐之  
風焉洪武癸亥春以賢良徵至京師授上海令上  
海地廣賦多民囁於訟稱為難治君至平弊政施  
恩威民皆悅之既而以罪去官執法者令服徒役  
未幾遇赦免君望闕謝買舟南歸因中暑暴病歿  
於清江之境其友人具棺衾櫬殯於新淦之桓洲  
君與余同歲而生余少長數月每切磋琢磨講  
明雅道有益於余者多矣於其卒也寧不為之

盡傷也哉乃作詩以述君之行亦以志余之哀  
也

葛溪有臞儒冰雪瑩懷抱世事澹無營經史日稽考謇  
余素相知同年復同道誼重比金蘭才高擅詞藻前年  
赴公車異縣得國寶廉勤恒自守始終竟莫保賜歸荷  
皇恩抱病因熱惱望鄉無百里淪沒殯江島嗚呼哲人  
萎寂寞青山老痛哭悲風來愁雲翳穹昊

雨後寄何幼恭

積雨生夏涼微雲凝午陰逍遙庭樹下拂拭朱絲琴流  
水滌煩慮好風飄素襟誰能同此樂惟有故人心

喜雨示諸生

乾坤開泰運時和致年豐仲夏甘雨足黍苗既芃芃清  
晨出東郊談笑值田翁辛勤乃有獲鹵莽難希功感此  
還自歎耕學理則同從茲共勉勵無使愧良農

自歎一首示贊貫二子

少壯頗疎懶老至精神疲雖耽古人書畫誦夕已遺拊

髀常自歎人生果何為良田不耘籽年登恒苦饑為學  
不勉勵歲月空自馳悔悟雖已晚踐履斯其時作詩示  
汝曹盛年當勉之

秋日憶妻仲實

秋風吹庭樹黃葉紛紛落時序有更遷愁懷自蕭索俯  
思年少時攜手共行樂容鬢今不同文情宛如昨

秋日憶何同德

結交三十載回首如一朝往事君莫論別恨終難消秋

風感衰鬢皓月懷清標吾道其已夫斯人甘寂寥

讀淵明詩

霜風透窗隙皓月流清輝良夜誰與同孤燈對陶詩新  
意自有得舊題頗知非從茲循軌轍庶免惑多歧

冬夜懷曾君季孫何君有大

良夜霜氣肅繁星麗高天微風響殘葉徒倚臨前軒時  
物有榮悴容華非昔年人生會能幾憶別心煩悽

北平檢校謝叔賓左遷廣東仁化縣幕職復以朝

賀後期謫雲南安置余與叔賓為姻友昔別各淚  
下霑衣今相去萬里而三載不面烏得無離別之  
情哉

別淚不可忍相思心愈傷雲南瘴癘地十月無冰霜天  
運有往復聖情思否誠終看沐休澤罷俛安其常

題嚴氏釣隱

尚父遇西伯子陵辭漢光胡為異出處所貴安其常斯  
人樂漁釣榮辱兩俱忘桐廬在何許烟水自微茫我性

愛樵牧無心慕軒裳為君發吟詠有興在滄浪

題鄒氏養浩堂

二氣生天地運行無息時惟人在所養失養斯餒而是  
以君子心操守固或違充然集衆義勇往將奚疑君家  
本儒素養浩畫堂楣旨哉孟氏言允為百世師

寄父錄事潛虛

南州有一士養浩歸園田與世素寡諧尚友千載賢濁  
醪泛佳菊細和淵明篇而我慕斯人離別今有年雲山

渺無際安得同周旋

寄王知縣彥翬

辭榮抱幽獨足以全其真舉瓢酌山月掃石眠松雲吟  
詠謫仙侶棲遲巢父隣何當訪猿鶴從此遠塵氛

江上有懷張叔恭

清川日悠悠遠樹何蒼蒼羣雁向北飛孤鶴獨南翔  
羣人樂棲遯采薇陟高岡相思不可見烟霧正微茫

雨中寄張文凱

川原春夏交淫雨無休時閒門掩芳草隣曲往還稀遠  
樹帶雲靄山鳩猶暮啼懷君當此際欲往畏途泥

聞徐縣丞伯澄館中病起

大江何瀰漫咫尺若千里注目广山雲懷君病初起眷  
言託交情金石良可比離別慨經旬楊花逐流水

悼亡

衰年失內助撫事懷百憂傷哉兒女情哭泣無時休感  
歎裂中腸涕泗忽交流悲風既慘慘白日空悠悠容顏

不復見恩義莫能酌恨無神仙訣千歲同優游

憂思不能忘鬱結何由開一杯強排遣頃刻還復來落  
花隨春風片片拂簾幙不見閨中人韶華成寂寞

出還

將歸懷百感及門愈悲酸入室見虛位痛哭惟憑棺總  
帷起悲風白日淒以寒九泉不可作長夜何漫漫月缺  
有時滿壁毀終難完莊生自曠達我獨摧心肝

余客滄洲之上對月有懷路川何先生伯善寄此

用代手簡云

峩峩華蓋山下有隱者流餐松養性靈築室事藏修壹  
曰薄軒冕世異還歸休閑門恒著述拄杖或夷猶宇宙  
慨千古烟霞娛一丘相思對明月羈思滿滄洲

聖主得賢良詩

高天羅萬象巨海納衆流盛世逢休明俊彥皆羅搜虞  
舜舉元凱湯武用伊周典謨訓萬代仁化洽九州吾皇  
法古聖令德日以修求賢不暇食日為蒼生憂杞梓入

廊廟樗櫟在林丘作詩繼雅頌亦足贊皇猷

江上有懷石門梁先生

微陽落平沙高樹帶殘雨客思墮微茫漁舟泛容與蕭然來遠風獨立誰與語悵望西飛雲相思渺何許

題孫氏巖雪齋

天生小崆峒屹立太古初玄冬積皓雪瓊樹高扶疎爾性愛清潔對之還結廬誰憐苦寒夜相映讀羣書

題吳大使文昌觀海圖

波光涵太虛樹色帶青靄宇宙一何悠山川長不改逍  
遙陟層臺俯仰成千載欲與沙鷗盟扁舟亦浮海

題吳南任棲雲樓

朝訪棲雲人暮登棲雲樓山深雲氣合樹夾翠光浮溟  
涒若太古逍遙及涼秋心游宇宙內契合神仙流

四皓對奕圖

山中茹紫芝石上奕殘棋勝負本無意行藏斯有時高  
風惟見畫白髮總成絲撫卷懷千古微公漢祚危

友人陳仁輔好古之士也效古體以贈之

古人不可親古道不可離古貌人所見古心誰得知陳君頤好古要我題古詩詩古讀風雅道古仰庖羲懷古在鴻荒感古長歎歎

學山詩為徐縣丞伯澄作

祖晚山父如山  
故自號學山

天行本無停一息可萬里人學法乎天乾乾詎能已譬如欲為山初焉覆一簣豈暇計歲功未成安可止一朝成高山萬古蓄元氣雲霧含氤氳松柏藹蒼翠廟堂需

棟梁風雨資大庇未成一簣者視此寧不愧偉哉學山  
翁善學足繼志罔俾眉山人專美假山記

友人張季倫喜予五言古體蒙見和賦此為謝

東坡慕淵明往往和其詩顧我復何人謬蒙君子推林  
園無異歡吟詠每忘疲感君屢賡歌恍若奏金徽魏晉  
世已遠高風今見之七襄不成報臨風渺予思

題黃伯原友鶴軒

人倫重五教物類稱四靈奇哉九臯鶴亦復載諸經性

潔無與比君子化其形巢雲松柏高警露風月清是以  
貞素士取友非虛名紛紛重勢利幽獨鮮交情豈不愧  
鳴鳥時聞求友聲

題教膳部歸田卷

聖代徵賢良山林有遺逸斯人抱奇才歛起輔王室鼎  
鼐事調和禮樂正得失從容近清光明哲保終吉賜歸  
憫者年養道得閒日田園未荒蕪林木正森鬱蘭香襲  
衣裾竹色映書帙支頤靜看雲發興或操筆貞素為已

有榮辱視外物余生亦棲遯嘯傲烟霞窟安得從教仙  
燒丹蛻凡骨

秋日覽物有感寄丁御史子堅

鴛鴦有定偶鴻燕無同時覽物遽興感懷人復生悲情  
深託綢繆道遠成睽離疑義誰與析良晤終難期哉哉  
葛峰高瀾瀾清江肥何當共釣游永與塵事違

題金好仁樂志堂

城市與山林誼寂本不同澄心即淨域豈必在山中斯

人守一塵澹泊猶古風圖書列左右日月從西東俯仰無愧怍行藏任窮通悠然觀萬化其樂那有終

題謝彥剛養浩堂

培根枝葉榮養氣身體充體充本無物道義存乎中孟軻真亞聖立教誠有功一登養浩堂俯仰懷高風

題劉氏圭峰樓

層樓面圭峰峰色自蒼翠隱几聞松聲開軒納雲氣神清餐沆瀣境靜隔氛翳對此彈絲桐中含太古意

題吳克承雍穆堂

喬林蔭豐溪中田構華屋靡靡庭下蘭猗猗檻前竹端  
居習儀禮少長咸雍穆春醪介眉壽動止膺百福允矣  
斯道存庶幾敦薄俗

題符氏靜軒

陰陽本無形配合乾與坤陽動司發育陰靜乃歸根冥  
心觀造化至理諒斯存何當掃閒軒日與靜者論

題高子完具慶堂

斯人薄世榮所厚在倫誼構堂奉雙親綵衣日娛侍崔嵬靈椿古豐茂萱草翠培養全其天南陔庶無愧

登羣玉峰

羣玉有佳處登臨諧宿心千巖互隱見萬木含陰森極目小天地曠懷無古今臨風一長嘯孤鶴下遙岑

晚興

西嶺下紅日前林生白烟憑軒散游目歸翼何翩翩彼物自閒適此身胡不然冥棲在巖谷養道希長年

中秋夜客中思親

明月今夕圓良朋一時集四坐各驩虞中懷獨憂悒所  
憂浩無端所慕嗟何及清歌那忍聞背面成悲泣

雨後訪江上親友

今日天微和駕言適江口春風如有情拂我沙頭柳上  
有黃鶯鳴闋闋苦求友感此懷故人交深別離久相逢  
且論心豈在接杯酒古道良可敦浮名復何有

雲谷為王笥道人賦

幽意在雲谷高風懷考亭東西雖異地復此託嘉名杳  
靄翠峰合氤氳佳氣生窗虛白日晚衣潤暑天清坐石  
對仙客焚香觀道經松花宜酒味泉響當琴聲窈窕絕  
塵鞅道遙違世情何當託棲遯服食致遐齡

偶題

平生寡嗜欲所好在吟詩朝夕吟不已鬢邊已成絲幼  
女頗解事長跪陳戒辭吟止適情性勿使精神疲深感  
吾女言而我樂在茲一日不吟詠滿懷動憂思阿女顧

予哂予心還自怡春風入庭院花陰滿前墀清興不可  
遏把筆更須題

春愁曲

昨暮思出遊今朝還復止瀟瀟風雨聲總在春愁裏落  
花沾汙泥片片飛不起何事與閒愁共付東流水

暮春閒居

冉冉春已暮瀟瀟風雨交殘紅付流水新綠蔭衡茅玄  
鳥識時序雙雙尋故巢靜中方遣慮憑儿玩羲文

春日寄丁御史子堅王知縣彥暉

光風拂柔條膏澤被幽草翟雉羽毛鮮倉庚語音好彼  
物各生成吾年獨衰老感此惜韶華觴來即傾倒樓遲  
託丘園窮達付穹昊却憶同心人貞堅永相保

仲夏

仲夏足時雨良苗被東臯辛勤畢農務餘暇且遊遨擣  
杖歷阡陌涼風吹鬢毛公劉世已遠守拙謾希陶

讀淵明詩

古詩出性情氣運闢盛衰聖人既刪述可以絃歌之後  
來移習俗綺麗誇當時淵明本清真沖澹乃其宜我性  
頗淳朴平生愛其詩駕駘事鞭策安得同驅馳

丙寅歲饑且旱禱而遂雨

驕陽欲肆旱我心日憂煎搊衷訴真宰甘雨倏沛然况  
復連日陰潤澤斯能全晨登龍畝間眺望涼風前嘉穀  
總生意衆草亦鮮妍始知天地心長育無枯偏我生食  
破硯亦有東臯田年饑幸豐稔喜極著斯篇

余居金川玉笥之間以漁樵耕牧為樂賦詩四首  
落日照廣川娟娟垂釣絲遠風忽徐來飄飄吹我衣彼  
物恒自得此心澹忘機渭川不可想玄真乃吾師

白雲滿青山山深雲自閒朝朝躡蘿連伐木向雲間鳴  
鳥出幽谷流泉響潺湲負薪行且歌世事無相關

鬱鬱牆下桑芃芃隴上苗開春理農務生計願豐饒時  
雨夜來過滿田嘉穟抽欣然顧兒女一飽復何求

耕田藉牛力牧養須及時驅之入郊原泉甘春草肥扣

角聊復歌日暮徐徐歸從渠笑貧賤頗勝蹈危機

明明中天月

明明中天月良夜流清輝自從開闢來不知幾盈虧人  
事有代謝天地無窮時安得求長生對月常吟詩

飲酒

淵明好飲酒重觴即忘天李白性所同自稱酒中仙我  
素不解飲飲少亦陶然酒能助詩興一斗成百篇我飲  
僅數杯我吟亦數聯誰知醉中吟其樂不可言

月夜述懷

貧賤非可樂所樂安其常紛紛名利途而我業田桑朝出自荷鋤暮歸還舉觴微微山風來皎皎明月光幼女勸加餐諸孫牽我裳相顧聊一哂萬慮俱消忘

洪武丙寅有妖僧誘愚民為亂不旋踵而敗有感而作

乾坤蓄四德品彙資生成彼物固蠢然人心本虛靈奈何庸愚者往往輕其生大義廢綱常春秋重典刑中心

懷惻隱作詩垂戒懲

釋疑

杞人憂天傾晝夜忘寢食吾嘗笑其愚今為衆所惑賴有聖賢書潛心豈無得至理不可誣渙然若冰釋

題陳伯霖竹深處

何處還清幽乃在深竹間天風動琅玕鳴珮聲珊瑚翠  
含帶烟色陰森生夏寒逕微通窈窕意適任盤桓厲操  
歷冰雪安巢棲鳳鶠客來須徑造蓬戶不曾關

與故人論詩

故人賞我吟操紙索我題展席臨清風頗覺心神怡幽  
禽何方來和鳴在高枝文魚亦游泳新水初盈池對此  
發清興援琴賦新詩鄭衛非所好鮑謝難同時古人如  
可作淵明真我師

述先訓

先親有遺訓家本積慶門富貴非所慕以安遺子孫堆  
牀積編簡繞宅置田園世世力耕學餘事安足論苟能

慎所守我死如生存總角佩先訓自勵窮朝曛行行向耳順白髮日以繁恒恐墜先志作詩貽後昆

菊逸為張與謙賦

淵明避世俗種菊繞東籬高風邈難逮幽趣鮮能知時有慕陶者愛菊亦如之飲水可延年餐英可充饑培植千萬株雨露日以滋草木遂天性人豈殊於斯優游樂肥遯氣充神且怡彼哉逐聲利於道乃相違何如委窮

達閒飲誦陶詩

次劉俊欽見寄韻

微風度雙鳥落日鳴孤蟬悄悄動離思悠悠傷暮年因  
思同心友載誦停雲篇俯仰天地內夷猶江水邊漁舟  
閒白日旅舍隔蒼烟踰月不相見來詩娛目前

擷蘭生詩為陳長文賦

吾觀天地化草木亦已蕃光風汎九畹膏澤被崇蘭美  
人擬為佩采采幽巖間何當遺所思報以青琅玕

客歸遣興

旅館厭逢迎還家少來往山風時自生浙瀆有清響無  
言玩羲文陰陽識消長動靜各有機澄心得所養

病中

平生厭拘束所好在遨遊淹旬抱寒疾閉戶擁衾禡地  
爐燒滑拙滿室青烟浮開軒畏風色面壁心煩憂鄰曲  
相慰問聲歎弗能醉良醫不易致藥物忌所投至人善  
調攝失養將何尤從茲保元氣天地同周流

寄李伯韜兼呈梁徵君

乾坤蓄清氣日月垂休光聖明既有道文運亦以昌羣  
才生斯時李君乃其良雄文煥星斗令德猶圭璋我思  
見其人道路阻且長翩翩雙黃鵠舉翮各飛翔為吾謝  
梁公夢寐心不忘

題何幼恭所藏方方壺洪崖圖

洪崖蓄元氣蒼然太古色乾坤一砥柱巨靈豈能摩衆  
山非不高蒙翳多荆棘茲崖獨荒涼乃有古仙蹟偉哉  
方壺仙善畫人莫識揮毫奪神功白晝天昏黑  
方壺仙善畫人莫識揮毫奪神功白晝天昏黑

題婁仲實繼志齋

先人誨後人後人繼先志所遺非簾金一經乃傳世蕭然坐幽齋齊外列叢桂靜觀河洛圖造化有深意

哀詩錄寄富溪朱孝子且以自哀吾母云

吾母久已歿汝母亦不存哀哉不有母何由生我身幼小俱失怙喪亂家益貧衣食仰慈母教育乃成人母歿身獨在再見嗟無因慈鳥未返哺哀鳴夜達晨呼天杳不聞痛恨何由伸母德實深厚至哉比坤元報答恐無

地揚立當顯親曾參有明訓與子書諸紳

題王自閒守拙齋

自閒四子命名曰可漁可樵可耕可牧

堪輿何茫茫萬彙生其中鴻荒世已遠淳元變澆風智  
巧日以滋古道誰能崇猗歟谷中叟讀書且明農衣不  
尚紈綺門惟掩蒿蓬漁樵與耕牧四子各已供此心常  
自閒衆欲鮮能攻從人笑懶拙巧者勞其躬

覺襄自遣

生世誰不老既老何必悲但恨減情思未成千首詩前

瞻愧蘇李後企師陶韋吐辭無詮次醉裏聊書之君聽  
樵人笛信口雲中吹

幽居

山中有流水隴上多白雲二物本無盡幽居誰謂貧朝  
耕在雲裏夕釣臨水濱此外復何樂讀書師古人

蓮

幽花何亭亭性潔出連漪其香遠逾清藜玩非所宜物  
有君子操人豈不如之彼哉譽昌宗我獨思濂溪

豐年

豳風世已遠王業今復隆豈敢辭艱難治本當力農維時降甘雨我稼已芃芃一稔定可期未私乃先公公家畢租稅祭祀亦已供飲酒日為樂不知年歲終

戊辰歲夏五月嘉穀初華而北風不止民以為憂恐秀而不實子乃默禱於天越翼日忽南風足以


阜財解愠有喜而作

仲夏多北風拂我庭樹枝樹枝不足惜嘉穀乃非宜默

禱若有應今朝反南颺憑高一眺望品物生光輝天道  
妙斡旋聖心乃弗違至公在刑賞足以安羣黎

題臨川黃九鼎北山清隱

周顥去北山乃取當時譏君為北山隱豈蹈昔人非地  
異名偶同居偏心自怡白雲滿窗戶清風拂裳衣近招  
華蓋仙遠憶商山芝竹松可厲操琴鶴鎮相隨於此樂  
清澹浮榮非所知



玉笥集卷一

欽定四庫全書

集部

玉笥集卷二

詳校官中書臣孫衡

中書臣劉源溥覆勘

總校官進士臣朱鈴

校對官編修臣錢樾

謄錄監生臣沈錫爵

欽定四庫全書

王筭集卷二

明 鄧雅 樞

歌行

送范知縣美解赴京分題得九仙臺

王山根盤數百里上有高臺半空起地闢天開玉削成  
今來古往神居止亭亭萬仞撐晴空旭日照耀金芙蓉  
層崖疊嶂鎖晴霧紫蘿碧草搖春風九仙仙去一千載

不在維山定瀛海月明環珮每歸來臺上遺蹤宛然在  
使君閒暇寄登臨歷覽遺蹤慨古今指點羣峰三十六  
石崖飛瀑能清心蒼涼落日歸林鶴臺上霞光爛相爍  
翛然遊罷去朝天何日燒丹尋舊約

題陶用大淵明歸去來辭圖

用大名洪泗州虹縣人鎮襄陽授武節將軍

平

田園荒蕪亦已久彭澤何須求五斗徘徊三逕撫孤松  
悵望間雲數歸鳥耳孫為國勵精忠出處雖殊氣味同

却憶柴桑遊未得祇看圖畫仰高風

題謝知縣東山讀書圖

幽人示我東山圖耳邊如聞猿鶴呼雲生寒巖翠縹渺  
樹夾流水青扶疎中有山房絕瀟洒苔蘚侵階藤覆瓦  
角巾隱几是何人謝氏賢良讀書者

題丁御史五老履端圖

正月二日天氣和東風忽爾來相過汀洲草堂集五老  
春酒介壽歡如何吁嗟行藏信所遇白頭猶向山中住

不是當年遇繡衣畫圖那得留清譽

題李如愚環山亭

太行之陽有盤谷玉筍十里來環山山人高風繼李愿  
作亭正在山之間兩山盤迴宅幽阻一澗泓澄石可數  
居人比屋樂漁樵令族前朝列珪組當今天子開治平  
胡為不出留斯亭亭中佳景自可樂秋桂弄影春蘭馨  
長松亭亭間修竹上有鶴鸞下麋鹿興來掃石坐清風  
自拂瑤琴彈一曲琴彈一曲酒一壺醉後擊節歌嗚嗚

不須更問千鍾祿此樂人間還有無

題胡伯輝問月軒

天風浩蕩浮雲開人間颯爽無炎埃捲簾呼酒待明月  
玉盤飛上東山來須臾大地俱皎潔疑是千山萬山雪  
何處飛仙跨鶴來一聲鐵笛蒼崖裂君家本是故侯家  
問月何須起歎嗟試躡雲梯天上去廣寒丹桂正開花

題李如愚太白把酒問月圖

把酒問明月今古悠悠幾圓缺月輪雖缺有時圓人似

浮漚還易滅團團桂樹搖天風瓊樓劇飲歌吹濛舉杯  
邀月月在手何用捉月波濤中我願生年一千歲與子  
同醒復同醉不須步月向蟾宮羣玉峰頭共遊戲

和劉俊欽將進酒

蒲萄酒鸚鵡杯舉杯縱賞酴醿開翠裾紅袖緩歌舞戲  
蝶游蜂紛往來人生及時且為樂莫待花殘春寂寞賓  
朋滿座酒滿缸花前袖惹春風香少年此樂殊未央祇  
恐兩鬢成秋霜願招松喬與對飲乞取海上長生方

和劉俊欽華表鶴

遼東城上風淒淒華表柱頭秋月輝千年白鶴作人語  
至今聞者為傷悲傷悲復傷悲今古悠悠無盡時何當  
服食生羽翼還從海上尋安期

題羅宗瑞法師禱雨感應卷

南州大旱禾黍枯赤日照地如紅爐老龍臥穩鞭不動  
無乃上帝封江湖道人早歲曾學道能以精誠事祈禱  
綠章奏罷起風雷三日為霖救枯槁吁嗟妙道不可言

安得共究玄中玄君不聞武當昔有張洞淵道成擲筆

還升天

洞淵成道之日作頌曰行年八十一幻緣今已出擲筆歸去來太虛無踪跡

銅雀硯為謝檢校叔賓賦

鄴中廢瓦荆榛裏幾對鴛鴦飛不起千年雨露飽涵濡  
蘊蓄元精呵出水君家瓦硯古更奇龍尾鳳味真堪齊  
昔年蓋覆貯歌舞此日研磨助發揮嗚呼粉黛成塵土  
惟有文章照千古摩挲此硯為題詩漢魏興亡俱可悲

未央瓦硯為徐縣丞伯澄賦

未央廢後成荒草片瓦拾來如拾寶溝池磨洗却灰餘  
作硯寧輸銅雀好方平潤澤如鐵堅窗間試墨生雲煙  
大明功業可記述西漢文章宜校編吾知徐君實好古  
却憶鄒侯心獨苦嗚呼漢家宮闈四百年此瓦作硯人  
猶憐

豹枕為羅孟載賦

古今才名孰可數人言羅鄴詩中虎異哉石枕虎豹形  
枕虎哦詩魂不驚珊瑚琥珀未為寶此物辟邪人見好

向來借我枕向雲松巢黃斑逐隊聲咆哮

送醫士李文中歸永豐

葛仙仙去幾百年尚留丹井陽山前丹氣夜燭東南天  
不知妙道何人傳李君好仙仍好學到處題詩兼賣藥  
只今歸隱白雲深服食金丹養黃鶴

競渡歌

石榴花開燕新乳蒲風拂面收殘雨江頭競渡鼓轟雷  
千載遺風續荆楚嗟哉三閭賢大夫汨羅自溺胡為乎

懷王信讒薄忠義清溝豈肯同汙渠寧甘一死葬魚腹  
萬古湘潭深且綠至今競渡起歌聲聽者如歌還似哭  
喧呼兩岸聲沸天不知勝負誰家船錦幖奪得唱邪許  
盡說兒郎年勝年

清夜對月

萬古一輪月清光照九州長生白兔搗靈藥不能醫此  
萬斛之窮愁人生百年世稀有去歲紅顏今白首憑誰  
喚起謫仙人乘月高歌對樽酒對樽酒發長歎月中桂

樹不可攀功名富貴我何有詩卷長留天地間

中秋陪諸公燕集

去年曾赴滄洲期中秋對月哦新詩今年此夕月仍好  
却恨去年人易老美人置酒開我愁酒酣起舞仍歌謳  
歌聲激烈振林木桂香冉冉風肅肅月中白兔搗靈藥  
月殿霓裳奏仙樂人間天上際佳期笑把金杯恣謳謳  
恣謳謳情悠悠古往今來春復秋中天明月願長滿四  
海諸公常共遊

讀姚子深寄婁良器詩因述古作者之意次韻

淵明家住潯陽口籬下黃花門外柳素琴挂壁本無絃  
祿米何心求五斗五言家法信有傳日對青山題數聯  
平生所樂在杯酒百畝春風耕林田坡翁學陶得三尺  
古澹中含溫潤色昔年遷謫到羅浮一日詩名播南國  
陶蘇已矣遺高風皎若寒蟾行太空當時二老自曠達  
胸襟浩蕩春波融後來虞范金闔客海內文章乃為伯  
崑崙太華兩相高鷹隼飄飄勢無敵彼猶千鍾我一觴

奴僕命我從奔呼作詩固是性所好陶蘇虞范難為徒  
姚君英才最超越思入高唐更飄忽烏絲闌上寫春雲  
白玉杯中吸秋月別來去日急如飛澤雁隨陽梁燕歸  
人生乖隔每如此寧不拊髀長歎欷七山南去二十里  
不識興居近何似因賡妙句論古人更寫幽懷寄雙鯉

久旱用廖南溟韻

我有雙劒恨不斬虹霓虹霓日日天東橫隔斷山東雨  
暗山西晴良田六月塵埃生官家租稅乏供給胥吏打

門朝暮聲安得封書奏明主下詔即免今年徵君不聞  
府帖昨夜來點兵漢官政化今又更令民賣牛買劒東  
南征傷哉大旱政如此何不蠲租罷戰紓民情為邦乃  
以民為本本固未必邦家傾嗚呼本固未必邦家傾安  
民不戰四海平

芙蓉花邊燕客歌

朝見芙蓉開暮見芙蓉老韶光似箭不少留鏡裏朱顏  
豈長好主人留客多歡情玉壺置酒花前傾羣公掉頭

不肯飲何如莫向花邊行尊中有酒能盡醉花亦向人  
取歡意酒闌研劍歌莫哀明年花發應重來

奉簡羅淵泉

字民覽吉水人  
潤谷先生從孫

豫章先生八十餘有才不仕山林居黃塵黑霧暗滄海  
白髮青燈看古書古書喪亂今餘幾六籍瀾翻口能記  
喜尋玉笥雲松巢懶謁金臺朱紫貴帳前弟子列兩行  
絃歌事業相頡頏先生冠帶坐終日嬉笑怒罵皆文章  
有時吟詠長松下珠玉聯篇妙無價蘭苔翡翠徒紛紜

詞高義正闢風化塞余廢學今有年喜來侍坐春風前  
沛然議論何所似倒挽銀河傾九天染顎科名今已矣  
方干雲臥終能比老懷浩蕩誰得知我作長歌歌未已  
玉山高高春雨沱沱江滾滾明月波水流不盡山不老  
從此無如才思何

松壑為張仲倫賦

淦水東南望松壑秀色龍葱氣磅礴千株雪壓龍虎爭  
萬竅風生竽籟作團團白石春泉香中有一士身昂藏

問之不笑亦不語羊裘革履漁竿長松間貯酒三百斛  
醉采松花看麋鹿雨裏桑麻十畝園煙中蘿薜三間屋  
浩歎風塵今幾春漁樵為伴松為隣明年我亦從棲息  
松下憑君作主人

過彭蠡湖

天風送我揚州還挂席長歌彭蠡間鯨魚飛出白浪起  
恍惚搖動匡廬山匡廬九疊雲霄上平湖直與爭雄壯  
夜月龍吟百丈淵秋風雁落黃蘆港天開地闢元氣通

萬頃鏡面涵沖融東船西舫棹歌發北客南人萍水逢  
參差萬箇湖邊柳中有人家賣魚酒舟子乘風不肯留  
船頭兀坐空回首船頭回首心愴然人生幾得泛湖船  
却思大禹勤疏鑿功業留傳億萬年

王節婦詩

王氏之子年及笄嫁作進士梁君妻梧桐月冷鳳凰宿  
芙蓉露白鴛鴦飛當時舉案期偕老豈意風塵不相保  
投井寧甘死少年辱身那肯從羣盜高風凜凜冰雪寒

激烈壯士摧心肝君不見竇家兩女墜崖谷至今聞者為辛酸

鄒君伯謙南昌士族也挾筆墨來遊金川謁諸丈士余觀其氣宇不凡而有志於學告別歸省詩以贈之

鄒君南昌人來作金川客白面紅顏弱冠時瑤林瓊樹同標格曠懷喜結江海交掉頭不肯居衡茅五湖吟嘯弄明月胡為訪我雲松巢囊中出彩毫匣中取玄玉把

卷臨清流索我賦別曲愛君情似江水長留君不住空  
彷徨狂風萬里送歸雁落木蕭蕭鳴夕陽知君辭親亦  
已久雲白西山幾回首明年有約到南昌鐵柱觀前共  
沽酒

題高崇節地理卷

高君行年六十餘壯心猶似千里駒平生蹤跡半天下  
手持幾卷青囊書青囊之書世徒有妙理何人熟參究  
高君讀誦口爛翻要繼景純千載後君不見黃河萬里

天上来崑崙太華俱崔嵬  
乾坤定位聖人出金陵  
王氣何佳哉  
請君直上金陵去徑叩天闕  
與天語龍蟠萬古帝  
王州四海蒼生望霖雨

恒德堂為鄒母廖氏賦

二子伯瑜仲  
璋俱有孝行

小年曾讀共姜自誓篇  
使我敬之神凜然  
只今廖氏有恒德  
姓名千載同流傳  
廖氏本是良家子  
二十發居忍同死  
翁姑白髮子方孩  
自采蘋蘩供祭祀  
白日皎皎天蒼蒼  
此心百鍊堅如鋼  
當年自誓靡他適  
堂前終養仍

終喪容顏漸老子成立更築高堂面青壁歲寒何物耐  
風霜翠柏崔嵬二十尺

館市巡檢劉時中攝新淦縣事有政聲於其還鎮  
詩以美之

將軍英妙年神采照白玉紫禁曾依日月光青雲早展  
驛蹕足翠屏西下淦水東驛路迢迢當要衝我皇開國  
慎防禦子復領鎮持刀弓到官從容僅一載鼓角樓新  
民俗改夜月山中虎豹藏春風陌上桑麻藪居民外戶

夜不扃行旅往來能送迎三鄉父老服政令五歲兒童  
知姓名前年金川乏牧守點行悍卒喧騰久城裏居民  
日夜愁妻子難全況雞狗將軍政績大府聞領符攝職  
仍施恩首同主將嚴法律商賈坐肆軍轅門偉哉將軍  
人莫比文武才兼心似水政成弊革強梗摧鐵鞭躍馬  
城南回攀轅臥轅留不得夾道松風起寒色翠屏萬仞  
高瓊峴上有百尺青琅玕歸囊得詩凡幾首把詩坐對

屏山看

題丁子堅所藏張彥道畫唐官進馬圖

時二公皆  
御史歸田

張君上疏歸來早  
畫筆猶為當世寶  
向來得意寫龍媒  
雲霧晦冥雷電掃  
青絲絡轡御者誰  
却憶唐官初進時  
萬里來從沙漠道  
九衢翻動雪霜蹄  
當時天子惜良馬  
亦命韓生作圖畫  
只今閒却兩青驄  
春草春風在原野

題楊妃出浴圖

春光淡淡春風起  
百轉黃鸝宮樹裏  
宮中妃子繡羅衣  
晴來出浴溫泉水  
溫泉之水清且漣  
凝脂洗盡爭春妍

初疑滄海浴明月又如玉井開紅蓮君王一見生歡喜  
六宮粉黛誰能比一曲霓裳樂未終邊塵已暗三千里  
天生尤物徒爾為馬嵬竟死誰能悲丹青一幅半零落  
千載君王當鑑之

玉笥集卷二

欽定四庫全書

王筭集卷三

五言律詩

明 鄧雅 撰

寄周主事文瞻二首

天上辭榮日山中養道年閒將玉筋篆寫出白雲篇夜  
月蒲萄酒秋風櫂艇田知君有真樂那得共盤旋  
寂寞山房裏思君未識君空瞻一片月還隔幾重雲伐

木鶯求友巢松鶴不羣物情與人事感歎不堪聞

送知縣曹哲德明美解赴京

家住燕山北官居紫淪澑三年惟飲水永日祗彈琴政  
體吾皇意天知令尹心行看書上考入覲五雲深

題謝氏蘭玉堂

瓊樹三山種幽蘭九畹香移裁宜勝地列映近高堂自  
可紉仙佩真堪比玉郎因之懷謝傅幾葉尚留芳

謝友人惠首服

角巾存古制何必華陽求一幅勞相贈千金未足酬花  
間堪漉酒松下免科頭迴覺添蕭散逢迎遠俗流

謝子晟惠藤杖

嶺表歸來日枯藤得幾枝情深煩遣贈老去賴扶持正  
直能同操勺員頗中規終當乘暇日拄到謝家池

憶上海令黃子律

獨坐看新月長吟憶故人嬋娟同此夜離別又經春白  
髮催人老青山入夢頻無由一相見顧影倍傷神

客館辭歸

鐵冠兼卉服老去樂清貧流水琴中趣閒雲物外身竹  
房留客慣花逕弄孫頻自有幽棲處喧囂頗厭人

題李氏盤谷

幽居似盤谷流水繞柴門意適觀魚鳥年深長子孫耕  
耘聊自給理亂未曾聞何日操藜杖從君遠世紛

題張行之竹間亭

偶逢溪上友因造竹間亭路徑通幽寂烟雲入杳冥坐

來清客思題處有僧名最喜安巢鳳朝朝刷錦翎

挽黃玉潤

未見還堪恨云亡恨更多麟經藏箇馬鬣葬山坡無復蒲輪召空聞薤露歌高風不可仰吾道竟如何

題西門巡檢瞻雲堂

太行人

天際秋雲起官居思不任寧同弘景趣還有狄公心渺渺千重白微微萬里陰因之憶親舍遠在太行深

送謝子厚隨父之武昌

落日千山路長風萬里舟親朋憐遠別父子樂同遊白浪過彭蠡蒼烟望郢州非耽覽奇勝定省足消憂

題龍伯原桃源小隱

草屋孤村迥桃花一水深不同潘岳趣還有武陵心漁父應相問仙家或可尋年年愛春色把酒對芳林

白石硯

一片太古雪窗間猶未融堅凝端石比瑩徹水精同頗怪胚暉異堪誇制作工琢磨經幾世揮洒對清風

冰壺為宋一俊賦

表裏俱澄澈光涵一室中渾疑廣寒月落在水晶宮冷  
心神仙骨形全造化功平生愛蕭爽擬入訪壺公

題朱學淵石室山房

石室炎天冷雲窗白晝昏仙人常對奕詩客屢過門簷  
外松千尺琴邊酒一尊陶然忘世慮不似屬乾坤

暮春同友人觀江漲

江樹雨瀟瀟江波斷板橋望洋心若失泛艇興偏饒且

共漁竿樂須逃府檄招白鷗知客意並戲亦飄飄

清明日掃先墳

已過寒食節況值落花天對雨情無限思親淚泣然丘墟迷草莽天地慘風烟有鳥來何處哀鳴向我前

客中春望有懷永平毛教諭弘濟西安何大使維

翰

青山長不改白髮日偏多客思迷芳草年華逐逝波舊交成契闊往事亦蹉跎西北關山遠相思奈若何

悼亡

蚤歲期偕老中年慨獨存憑棺惟灑淚剪紙莫招魂令  
德宜家室深恩及子孫終當求密石為爾表高墳

寄何幼恭

時余失內助幼恭年將五十生子甫及一周而失之俱可憫也

我有悼亡戚君懷無後憂暮年那見此老淚不能收世  
事恍如夢江波空自流吟詩聊自遣寄贈若為酬

題曾氏松闌白雲

白雲何處宿旦暮繞松闌變化能為雨氤氳長在山濕

添枝葉重晴鎖戶庭閒未可自怡悅從今願往還

題周宗祥綠陰清畫堂

手種堂前樹經年長綠陰午風眠處冷晝日坐來深喜得山林趣能知雅頌音何當分半席蕭爽散塵襟

送徐御史服闋之京

海內賢良士人間孝義兒乘麻初脫後綸綺再徵時路去金陵遠帆開葛水遲應攀墳上柏洒淚告行期

題淵明畫像

淵明非嗜酒寓意酒杯中大化觀天地閒情對菊松風  
流千載上感慨幾人同稽首瞻遺像雲開見華嵩

題張孟憲綠陰棋墅

林園新雨後棋墅夏涼初嘉木蔭窗戶青山成畫圖機  
心元不競世事本來疎未問橋中叟斯人仙者徒

題鄒恒吾滄洲漁隱

結屋住滄洲開軒瞰碧流鳥啼烟樹晚風起荻花秋  
愁酒還堪醉鱸魚亦易求陶然忘世慮天地一虛舟

挽成之劉進士

歲月窮經傳名聲重甲科暮年遭喪亂吾道竟蹉跎正喜藏修好其如老病何貽文嗟絕筆痛哭望松蘿

挽何同德

一代衣冠士平生鐵石心有才赤世用多難祇愁吟歲月容華老風霜肺病侵不堪埋玉樹痛哭淚沾襟

晏起

老夫常晏起飯後始梳頭懶慢從人笑清閒得自由美

蔬聊當肉大布可為裘隣叟時相問農談酒數甌

題錢氏石田書隱

石田春水滿林館白雲多舊業惟耕學閒情託詠歌地  
偏宜竹樹檐迴帶藤蘿亦有藏修意何當共琢磨

題王煉師雲巢

石洞還堪隱松雲亦可巢九真勞夢想五老託神交混  
沌含元氣氤氳濕翠梢醉眠惟伴鶴羣翼任啾啁

送伯良姚君之廣西金城寨巡檢

聖主求賢日將軍領命時金城煩警邏鐵馬正驅馳日  
月昭王化弓刀示武威瘴烟看掃盡嶺表悉平夷

挽丁御史子堅

仕為文章顯名因政事杳泮芹新雨露臺柏舊風霜往事  
空流水荒阡幾夕陽遙知千載後潛德有輝光

何彥徽從軍遼東其父往問因寄

令子三年戍嚴君萬里行艱難俱可念相見若為情遼  
海悲聞鶴天河願洗兵尺書將遠意歸馬看升平

山中見梅有懷吟梅老人何幼恭

白髮堪憐我貞姿喜見梅倚闌成獨笑帶雪為誰開天  
地含元氣山林產異材遙知東閣裏吟賞興悠哉

題陳氏學堂山房

宦族宗秦國山居扁學堂古今留翰墨草木有輝光倚  
劖丹霄近看書白日長何當借雲榻共話到羲皇

重題

地為人增重山因學著名舊藏書籍在新築草堂成捲

幔通雲氣鳴琴雜澗聲知君事游息養素薄時榮

過孤山峽

窈窕孤山峽潺湲一澗泉望中如削玉聽處似鳴絃路轉疑逢虎峰高欲近天恍然得平曠林木數家烟

憶母

獨夜滄洲月清光照膽寒倚闌情脈脈憶母淚漫漫感慨成千古憂思集萬端那堪聽烏鳥啼到五更殘

寄鄒貢士仲律

故人久不見消息始相聞未說文章進深知行義敦讀書忘歲月為客信乾坤頭白嗟何補期君共討論

奉和李如愚見寄

老鶴千年壽閒雲一片心乾坤今古事風月短長吟官  
族西平遠仙家玉笥深何當騎白鹿閒暇一相尋

寄贈醫士劉東樵

方書傳幾世丹鼎有神功身在壺天裏民躋壽域中杏  
林藏一虎寶匣臥雙龍欲問長生藥螺山隔幾峰

客中有懷何大鏞朱學淵

去歲重陽日曾同醉菊花別來無雁信望斷惜春華風  
雨江亭暮雲山客路賒思君纔入夢厭殺亂啼鴉

客中寄文彬

細雨清明近幽齋白日長懷君當此際為客在他鄉有  
恨花隨水無情鬢易霜遙知故園竹新筍過隣牆

寄臨江道紀王默淵

聖代興玄教真人領篆章道書藏玉笥官舍倚清江已

羨承恩澤終能肅紀綱驚看斬邪劒每夜吐光芒

題父子才括蒼吏隱卷

我遊羣玉洞君寓括蒼山出處雖殊調心神本共閒煮  
蒲居石室收印入松闌豈被浮名縛悠然天地間

題百華寺

茲山白雲裏古寺覺城東徑濕莓苔雨窗寒薜荔風傳  
經由慧遠洗硯憶陶公暫借禪牀坐心澄萬慮空

吉文羅允瞻作時思堂以祀先而又閔其婦翁蕭

君彝翁死義而無後乃附祭於堂

蕭君死節義羅氏重彝倫禮謹春秋祀恩隆內外親九  
京寧有憾兩姓幸相因十載斯堂在聞風亦愴神

寄劉進士伯琛

舊交多寂寞高士近何如白首窮經傳青山繞屋廬種  
松招海鶴俯檻愛池魚養素無榮辱心存太古初

伊昔曾相見論詩一解顏別來經歲月望斷隔雲山撫  
事偏多感逃名且自閒葛峰多勝蹟那得共躋攀

東丘行素

久別丘行素重逢髮半蒼世情無係累文物有輝光歲  
月宜琴酒乾坤任海桑相知幾人在萬感集中腸

風雨訪劉孔殷不遇

瀟瀟溪上雨淅淅樹間風擬訪天台客難追葛水蹤尺  
書鴻雁遠樽酒父兄同飲罷題詩去重來意頗濃

宜詠樓

危樓供遠眺鬢鬟在黃州翠合羣山晚涼生萬竹秋古

今懷勝蹟天地汎虛舟此興宜高詠浮名不用求

遊郁木

郁木多朋輩重遊累作期峽寒霜落早澗曲水行遲藥  
擬分瑤草書仍訪墨池平生耽野趣一到一題詩

寄吳六舅從吾先生

儒名推令族吾舅冠羣倫但倚文為富休論病是貧莓  
苔深巷雨花木故園春近想多新作猶煩遠寄頻

憶外舅

陳姓字懷遠

外舅襄陽遠音書恨未通關河奔走外鄉國亂離中暗  
草江南路晴雲塞北鴻一尊林下酒談笑幾時同

枕上作

夢斷五更時山家雞亂啼風生梧樹裏月過紙窗西為  
客心牢落傷時氣慘悽遙憐征戰地萬骨委塵泥

贈別席煥章

風流席子雲游藝最超羣卷裏新詩句毫端小篆文折  
梅曾寄我看竹又逢君獨有憐才意臨歧不忍分

次王荀羅提點竹間韻

聞師臥竹陰故我竹間尋嵇阮平生趣求羊太古心月  
明看鳳宿風起聽龍吟想得題詩處毫端翠色侵

寄姚觀海

白髮感秋風淒涼世事空昔交騎馬客今伴釣魚翁歲  
月閒吟裏風塵醉眼中可憐同里閈只是各西東

題陳漢仁雪舫

幽人住城市小屋似扁舟素壁光含雪銀牀冷浸秋乘

風慕瑤島釣月憶滄洲同郡多名士相遇聽棹謳

鑿井

移家修竹裏鑿井屋西偏未盡兩日力能通三尺泉味  
甘同玉液色湛見青天頗快慈親飲容顏勝去年

贈滿公太虛

杖錫遊方外詩名滿世間相同明月好心似白雲閒香  
霧天龍繞松風海鶴還知師客入社堂上有慈顏

七夕留屏山館中

去歲山中客曾為七夕吟感時懷往昔守拙到如今生  
計田園薄羈愁歲月深不知牛女會還識此時心

題永豐令蔡行素朴實齋

百里安民俗陶然太古風布衣無長物茆屋有焦桐未  
覺羲農遠真堪卓魯同何須種桃李桑柘滿城東

哭兄伯讓

生至治丙寅以甲午  
歲饑因商遇寇害

重利輕生死哀哉負所天青山空有恨白骨葬無阡忍  
聽慈親哭誰為弱弟憐幾回風雨夜欹枕淚潺湲

鄒幼亨以名赴京告歸養親因寄二首

之子文章進嚴君德望尊家傳東魯派人說道鄉孫承  
詔曾飛動辭歸得清溫聖朝思孝治風俗喜彌敦

水驛曾追送天門又賜歸布衣霑雨露綵服拜庭闈生  
計思田里風光說帝畿解裘無長物滿卷燦珠璣

幼亨為錄玉笥集

習隱猶南郭知音似子期不關塵世事為錄老夫詩竹  
映當窗几雲生洗墨池遙憐揮灑處竟日不知疲

秋夜憶陳尚泰

白髮山中叟清秋卷裏詩五言推古淡數月惜分離雁  
過西風急鳥啼北斗垂懷君當此夜愁絕倚窗帷

暇日閱謝檢校叔賓詩集

北極開薇省東山築草堂斯人兼吏隱盛代有輝光用  
法元師漢吟詩更擬唐深慚策駕駘猶欲並騰驥

柬江泳思

賣藥同康伯吟詩學少陵驚看寫珠玉群得備參苓歲

月吾衰老山林子俊英何當種梧樹蚤聽鳳凰鳴

題鄒文彥永思堂

兵戈有寧日父母無歸時黯黯塞雲遠蕭蕭風木悲江  
流千古恨堂樹永思碑亦有先親念詩成不忍題

客歸與舍弟仲言從弟季言宴集

昔別憐桑梓今還撫菊松入門兒女笑展席弟兄同歲  
月全生計衣冠尚古風怡怡有真樂往事愧飄蓬

寄吳孔文

寒風吹野樹白雁起汀沙渺渺長江去曛曛落日斜半  
生同作客兩地各思家歲晏吳溪上梅開幾樹花

寄吳嘉靖

明月照江閣北風吹樹林數聲何處雁兩地故鄉心夢  
裏頻相見愁來自不禁歸程須早計莫待歲華侵

追悼先友曾吾忠

憶我年方壯多君學已明往還論古道生死見交情夜  
月書窗白春風墓草平不堪揮老淚況復聽猿聲

答劉修己

獨對山中月秋風正颯然未為攀桂客空學煮蒲仙  
鬢髮千絲亂琴書四壁懸故人憐寂寞詩寄白雲邊

次蕭編修用濟韻

新詩頗故友遠寄自城中豈意龍門客能思鶴髮翁別  
離塵世換著作古人同不有知音士誰憐爨下桐

寄九仙觀道士陳子雍

虬髯披鶴氅道氣養丹田身外元無事山中別有天姓

名仙籍注文字世人傳我有菖蒲鼎相期煮石泉

題秋林讀書處

江風寒葉落燈火夜窗虛潭上罷漁釣林中聞讀書沈潛知道味蕭爽得幽居勗爾抱貞獨榮名何足趨

挽陳長史絲溪二首

蚤歲攻文籍中年樂宦遊儒林有根柢王府贊謀猷山擁秦城壯雲連玉笥幽功成身已退底事致愁尤一死人皆有嗟君獨可哀金陵歸白骨玉笥失英才猿

嘯悲風急山空古木摧相過一灑淚明月照蒼苔

題梁園雪景扇面

梁園風景異興逐雪花移璫館東西戶瑤林千萬枝望  
中迷舞鶴賞處艷歌辭杖馬今何在風流見畫師

老去

老去惟疎懶閒來復歎歌倚樓孤月上隱几好山多野  
飯甘藜藿秋衣製芰荷不堪腰帶減長是病詩魔

寄何叔敬兄弟

一別踰三月相思復幾回山林多勝事伯仲總英才舊  
集題華鄂新居闢草萊遙知風月夜綵侍進霞杯

兵後訪西鄉宗族

西鄉喪亂後宗族幾家存弔古寧無恨分流本共源紫  
苔荒舊業喬木尚清門太傅留祠廟高風百世論

贈相地黃一初

老子雙蓬鬢長年醉復醒光陰隨鐵杖風雨護龍經水  
接江淮白山連華岳青牛眠何處是為我作圖形

五老慶春圖為子堅題

玉筍傳椒醑新年喜氣多東風如有約五老適相過列座衣冠舊相看鬢髮皤主賓情爛漫談笑盼庭柯

別醫士彭碧清

我愛彭居士蒼顏復古心醫名著江海隱興在山林放鶴雲霄遠燒丹歲月深相逢忍相別把臂欲霑襟

醫士李兼善歐鄉人持其祖嵩可所編運氣書一卷乃元吳文正公澄為之序引以示余余嘉之因

題五言四韻於其後

紛紛事醫術李氏獨專門學究內經祕心知萬化原著  
書忘歲月種杏滿林園撫卷懷先哲題詩付後昆

寄醫士李性善

白首攻醫業青山養道心藥爐猶伏火杏樹已成林歲  
月仙家永塵氛世慮深欲過龍虎峽相即坐松陰

美邑宰

公姓楊名仁字子山嘉興人廉勤自守政令嚴肅吏

民稱神明不可欺有漢良吏之風

宰邑承恩命臨民有政聲載星還出入與水共澄清道  
為朝廷重心於富貴輕何當告太史卓魯可齊名

上判簿二首

公姓王字宗道通經術有仁政

金川勞簿領政及魯中牟善教生民樂除奸鬼魅愁縣  
衙春映草更鼓月當樓公退無餘事羣經自校讐

迂闊無生計傭書到白頭歲寒松柏友月俸稻梁謀出

處由天命謳歌樂聖猷承宣當告別春色望龍樓



王筠集卷三